

Gvangjsih Minzczuz Bau

ganhhau: CN45-0036 B.2019 Nd.10 Ng.16 liggaeuq geijhah nienz ndwengouj cibbet

广西民族报

(壮文版)

主管主办: 广西壮族自治区

民族宗教事务委员会

编辑出版: 广西民族报社

出版期数: 总第 3395 期

Aen Cungsim Hoizguh Denyingj Vah Minzczuz Vunznouix Gvangjsih Denyingj Cizdonz Ndaej Aen Cwnghueh Daengx Guek Minzczuz Doxgiet Cinbu Mozfan Cizdij

Mboengqneix, aenhoih byaujcaugh daengx guek minzczuz doxgiet cinbu youq Baekging hai. Aenhoih byauj-cangh le mozfan cizdij caeuq mozfan bouxvunz vih guek raeuz minzczuz doxgiet cinbu saehnieb guh'ok gungyen hungloet haenx. Ndawde, Aen Cungsim Hoizguh Denyingj Vah Minzczuz Vunznouix Gvangjsih Denyingj Cizdonz ndaej aen cwnghueh "daengx guek minzczuz doxgiet cinbu mozfan cizdij", hix dwg daengx guek aen cungsim hoizguh denyingj vah minzczuz vunznouix dandog ndaej aen cwnghueh neix.

Hong hoizguh denyingj vah minzczuz vunznouix Gvangjsih 20 sigij 50 nienzdaih hainduj guh, ginggvaq le ca

mbouj geijlai 70 bi. Daj hoizfuk hong doihengz yungh Sawcuengh doxdaeuj, nyuenz Swcigih Minzyijveij cungj aeu cuengqingj hoizguh denyingj vah minzczuz dangguh loh hong youqgaenj ndeu daeuj guh. Bi 1985 doxdaeuj, nyuenz Swcigih Minzveij binaengz cungj aeu daengx gih ngaenzcienz hoizguh denyingj vah minzczuz vunznouix gyahaeuj bumwnz yawhsuenq, caeuq Gvangjsih Denyingj Cizdonz Youjhan Gunghswh ciemdingh mbaw hezyi hoizguh caeuq cuengqingj, bued cienz cienhangh haeujcoengh, sonyinx hong fanhoiz vah minzczuz daengj. Daj bi 2009 doxdaeuj, gungh miz 500 lai bouh denyingj gak loih daezcaiz hoizguh

baenz banj vah minzczuz vunznouix, cuengqingj daj hainduj binaengz geij cien ciengzbaez daengz seizneix 2 fanh lai ciengzbaez, bouxyawj minzczuz vunznouix daengz 300 lai fanh vunz-baez.

Ciuq cam rox, Aen Cungsim Hoizguh Denyingj Vah Minzczuz Vunznouix Gvangjsih Denyingj Cizdonz Youjhan Gunghswh cujyau rapdawz hong hoizguh, cuengqingj denyingj Vahcuengh, Vahmyauz, Vahdung 3 loh vah 8 loh vahdeihfueng Gvangjsih caeuq Vahmauznanz, Vahyauz, Vahging, Vahgwzlauj, Vahmulauj daengj mbangj di vah baujhoh.

(Cangh Haijyingh Lij Lizyungj)

Mbanjbya Mbanjmyauz Angqhoh Fungsou



Ndwen 10 ngoenz 11, Yungz-suij Myauzczuz Swciyen Gungdung Yangh banh ciet vwnzva gijgwn ndei haeuxcidrang saeraemxmbog gaiq daihsam, beix-nuengx gak cuz mbanj henzyawj caeuq bouxhek doxcomz Mbanj-gauhvuj Mbanjmyauz diegbya laeg neix, doenggvaq doxdax mo sae gaemh bya, caij din venz caeuq cimz sae daengj hozdung, angqhoh fungsou. Ndaw doz dwg vunzlai cingq caij din venz.

(Yungz Senh)

Aen Duenz Gofoux Minzczuz Cunghyangh Bae Dwzbauj Guh Hozdung Camnai Yienjok

Ndwen 10 ngoenz 11 banhaemh, Aen Duenz Gofoux Minzczuz Cunghyangh 《Minzczuz Ranz Vunz Ndeu • Byaij Haeuj Dwzbauj》camnai yienjok youq Dwzbauj Yen Dijyuzgvanj yienj, yienj ciengz heiq gig miz minzczuz daegsaek ndeu hawj vunzlai dangdieg yawj. Doengzseiz hix vih aen yienh neix angqhoh Cunghvaz Yinzminz Gunghozgoz laebbaenz 70 hopbi hozdung gyalai le haujlai angqyangz.

Hozdung youz 《Yamq Foux Angqyangz》hainduj, riengz dwk "aen funghyozdonz haj saek" youz gimz-gyaeujmax, gyongfwngz, duhdajwz, aizegzgwz, gimzgyahyeh 5 loh gyong laz

gimz yienz minzczuz vunznouix gapbaenz neix caeuq dienhsing yozdui yienj 《Youq Dieg Gyae'gyang Haenx》daengj go yaem'wenq gyaundeih, daegsaek yienhda, lijimiz canghgo Cauzsenhcuz Ben Yinghvah 《Dah Sausien Ginhdaizlaiz》, canghgo Bouxcuengh Muz Linzlinz gagciengq 《Bae Haw Dauqma Ahlili》, canghgo bouxcoz Cangcuz Ahvang 《Diuzgo Ceiq Gyaeu Ciengq Hawj Doxmeh》《Cozmaj》, canghgo Cauzsenhcuz, bouxyienj itgaep guekgia Lanz Gen 《Cunghvaz Ranz Vunz Ndeu》《Gikleih Vuenyungz》…… Yienjok ndeiyawj, ndaej daengz bouxyawj yienhciengz dopfwngz haen.

Ciuq cam rox, baez neix Aen Duenz Gofoux Minzczuz Cunghyangh bae Dwzbauj Yen haiguh roengz mbanj yienjheiq dwg hangh gunghcwngz leih lwgminz youqgaenj Guekgia Minzveij bangfuz Dwzbauj Yen ndeu, muzdiz dwg senhconz minzczuz cwngecwz dangj caeuq guekgia, cienzndenq gij raeuj dangj caeuq guekgia, coicaenh gak minzczuz doxgyau dox baedauq doxyungz, vih dieg minzczuz, dieg gungz-hoj dwkhingz vut gungz gunggeng, cienzmienh hwnjguh aenbiengz siugangh gya rengz.

(Nungz Yungjifang)

SIUSIK DINJ

● Ndwen 10 ngoenz 11, Lozcwngz Mulauzczuz Swciyen youq Mulauzczuz Heiqyienh banh angqhoh Cungguek moq laebbaenz 70 hopbi caeuq seizdaih moq vwnzmingz saedguh hozdung "gou caeu guekcoj gou"——hoih doeg sei mbouj lumz goeknduj. Hoih doeg sei yungh sei guh moiz, yungh sei cienz cingz, yungh gij yinxdaeuz sing'yaem, hohfuk Cungguek moq laebbaenz 70 hopbi.

(Luz Ciuhyinz)

● Bineix doxdaeuj, Lozyez Yen gyalai baujhoh "makmizhouzdauz Lozyez" binjbaiz, giethab saed-saeh, mboujduenh gyagiengz guenjieix 29 aen hozcozse makmizhouzdauz aeu ndaej gij gienz geiqhauh cienyung h haenx yungh geiqhauh cingzgvang. Daengz ndwen 9 ngoenz 25, "makmizhouzdauz Lozyez" binjbaiz bang-rengz aen yienh neix hwnj-guh baenz 4 aen suen makmizhouzdauz, leih daengz 9600 ranz ranzungzhoh, rengzrwd doidoengh cinjcing vut gungz.

(Loz Cinghcingh)

● Bineix doxdaeuj, Vanzgyangh Mauznanzcuz Swciyen gaenxmaenx lienz-haeh youzcwng giyez, yungh gwnz muengx hawciengz siugai doxciep caeuq gijndei bingzdaiz doigvangq giyez, mboujduenh gya'gvangq diuzroen gai doxgaiq reihnaz. Youzcwng giyez ciuq hangz-gyaq soucawx doxgaiq reihnaz, caemhcaiq daengzdieg mbaet aeu couh fatsoengq, bang gyoengq vunz ndaem mak gai mak, gaijez gij youheiq gyoengqde.

(Veiz Yui)

● Ndwen 10 ngoenz 12, Ginhsiu Yauzczuz Swciyen Luzhang Yangh haiguh "fwngz hung daz fwngz iq, doi sezgyau" hozdung. Doenggvaq dangciengz ganggej anqlaeh, fat ceksa senhconz, baij cihsiz canj-banj daengj hawj hagseng caeuq bohranz, hawj hagseng caeuq bohranz roxyiuj gij sienghaih sezgyau, gagrox lizgyae sezgyau, daeqceih sezgyau, doi sezgyau.

(Gauh Yuzginh)